

Perkauman di Malaysia perlu dibendung, elak pembersihan etnik, kata Zahid

The Malaysian Insider

Oct 2, 2015

Oleh Yasmin Ramlan

Isu perkauman di negara ini masih dalam kelompok yang kecil, namun ia boleh menjurus kepada pembersihan etnik sekiranya tidak dibendung, kata Datuk Seri Ahmad Zahid Hamidi hari ini.

Timbalan Perdana Menteri yang juga menteri dalam negeri berkata demikian ketika ditanya pandangan beliau mengenai ancaman perkauman yang perlu ditangani di peringkat Asean.

"Rasisme adalah pada saya, sikap perkauman yang dalam kelompok kecil, tetapi soal militansi, radikalisme dan ekstremisme itu lebih luas bentuknya.

"Maka, kita khawatir jika rasisme ini tidak dibendung daripada awal, akan berlaku 'ethnic cleansing' (pembersihan etnik) seperti yang berlaku di beberapa negara.

"Dan ini mesti dielakkan," katanya selepas mempengerusikan perjumpaan "Special Asean Ministerial Meeting on the Rise of Radicalisation and Violent Extremism (SAMRRVE)" di Kuala Lumpur hari ini.

Sebelum ini, isu perkauman sering melanda negara termasuk terdapat pihak yang mengadakan perhimpunan mencetuskan lagi sentimen itu terutamanya antara orang Melayu dan Cina.

Himpunan Rakyat Bersatu pada 16 September, dikritik kerana retorik perkaumannya, walaupun penganjur mendakwa perhimpunan itu sebagai respons kepada Bersih 4 yang diadakan pada 29 dan 30 Ogos, menggesa antara lain peletakan jawatan perdana menteri.

Perhimpunan yang diadakan badan bukan kerajaan pro Umno itu menyaksikan kekecohan di Jalan Petaling, di mana peserta cuba merempuh masuk kawasan yang didominasi peniaga Cina itu, serta kata-kata kesat seperti ungkapan "Cina babi" dilemparkan.

Sehari selepas perhimpunan yang juga disebut himpunan baju merah tersebut, salah seorang pemimpinnya, ahli Umno Datuk Jamal Md Yunus berkata tidak salah menggunakan perkataan itu kerana ia bukan satu penghinaan memandangkan orang Cina memakan daging babi. – 2 Oktober, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/perkauman-di-malaysia-perlu-dibendung-elak-pembersihan-etnik-kata-zahid>